

Yuehal Sul Cir Ber

1

Olga Zza Ddar Ddei Leil Biar

¹ Ngua eil mel vaexr a mel merlo-milo lei nr zza seir dder zza ho hal ddei leil nia leil biar gger. Hal ddei mel dder ngua armael bbejjiur goxr, mia goxr, i goxr, halae mox goxr ddei nga a. Yar mel olga zza. Yar ddei ddar mel lei ca leil olga zza lol.^a ² Olga eil ddei mel ngua leil mia lol ho a. Ngua ngua mia mel, nia leil biar gger. Yar mel cirse-cirsil olga zza doxr dae su ddei a. Yar halleix dder Merhhexr Arbbor Arbosobo dax cirgo a hher dax dae; nael eilleix ngua leil mia lol goxr a. ³ Ngua yoxl, ngua mia goxr nei bbejjiur goxr ca hal ddei leil nia leil biar gger a,^b yel nia leil ngua nixmox ddei dax ciryoxr a nga lol. Ngua mel Merhhexr Arbbor nei yar Ssor Yisu Zidu^c nixmox ddei dax ciryoxr a nga ho a. ⁴ Ngua eil mel nia leil biar gger a mel niul^d leil ggese gaxzi lol.

Bbele Ggie Ssi

⁵ Ngua Yisu Zidu dax bbejjiur wo ddar mel nia leil biar gger: Arbosobo

^a**1:1** Yuehal Sul 1:1-18 leil lei biar dae.

^b**1:3** *Ngua yoxl, ngua mia goxr nei bbejjiur goxr ca hal ddei leil nia leil biar gger a, Yaa mia goxr nei bbejjiur goxr ca hal ddei mel dder Yisu Zidu nga a.*

^c**1:3** *Yisu Zidu* Yisu mel Zidu a. Zidu ddei yilsu mel dder Arbosobo ca ar ddei leil tiur teixl lei a, cassor-worssor leil jiuxl lei. Xilaxl ddar nael “zidu” ae; Xiboxrlaexr ddar nael “mirsaexlyal” ae. Yilsu ciryoxr a nga.

^d**1:4** *niul* Arbosobo Ddei Sul cirberber leil a mel “niul” ddei mel “nia” bbeix.

mel bbobbolbbo, yar dax mel neixmar cirdoxr lei nr zza. ⁶ Niul bbeix niul Arbosobo ddei nixmox ddei dax ciryoxx a nga bbaexl eine bbeix, nael niul halae Yisu leil ddar-nr-zzi a mel dder neixmar ggje ssi dae sael a nga. Eine mel ca leil fur dae a; yarzi mel dax lei bei nr mae dae a. ⁷ Nael niul Yisu leil ddarzzi a mel bbele ggje ssi dae a, hherdder Arbosobo bbele ggje hher dae sael a nga. Eine nga a mel niul nixmox ddei lei zzicarzzi dax ciryoxx a nga a. Yar Ssor Yisu ddei sirnilni mel dder niul zuixl mel bei pixl gger a, niul nixmox zzar seirceix-seirmaer lol a.^e

⁸ Niul bbeix niul armael mel zuixl nr zza bbaexl eine bbeix a mel, armael leil fur dae lalnga, halae nixmox zzar ddarzi lei hher nr ji dae. ⁹ Nael Arbosobo mel arsae bbeix arsae bei, yar nixmox lei bbaehhex, yel niul armael zuixl zza cexrssexl arddeirnga a mel, yar dder niul leil ssoxrsuxl, niul nixmox zzar nr seir, nr hoxr hher ji dae maelmaerjjia bei pixl gger. ¹⁰ Niul bbeix niul armael zuixl bei nr goxr bbaexl bbeix a mel, niul dder Arbosobo leil ca furllesu ar ddei bbeix mal gger a; yar ddei ddar mel dder niul nixmox zzar hher nr ji dae a.

2

¹ Albor, allor, ngo nia leil eil mel vaexr gger a mel, nia leil zeixleixr zuixl bei nr dax lol. Nael arseir halae zuixl bei arddeirnga a, niul leil beijjiu su ar ddei zza. Yar mel Merhhexr Arbbor dax niul zuixl mel leil ssoxrsuxl lol qiuxr gger dae. Yar mel dder nixmox cirtaex-lorbba seir gaxzi Yisu Zidu ddei nga a. ² Yar olga ddei niul leil dir gger ssi a Arbosobo leil zilabox ddei loxr a, yel Arbosobo niul ddei zuixl mel leil ssoxrsuxl a. Yar niul leil lar olga dir gger ssi nr nga a nei, cassor-worssor maelmaerjjia leil lei dir

^e**1:7** Yisu sixrzixljiaxl ddei leil si a, niul leil olga dir gger ssi a, yel Arbosobo niul ddei zuixl mel ssoxrsuxl a, niul nixmox zzar seirceix-seirmaer lol a.

gger ssi a.^f

³ Niul Arbosobo miardal dae mel dax bei mae dae arddeirnga a, niul dder saexl niul mel yar leil saexl su mel a. ⁴ Yel ha arseir bbeix, ngo Arbosobo leil saexl bbaexl eine bbeix, nael Arbosobo miardal dae mel dax zzael bei nr mae dae, eine nga a mel dder ca fur su lar nga a; ddarzi mel lei yar nixmox zzar hher nr ji dae a. ⁵⁻⁶ Ha arseir Arbosobo ddei ddar no arddeirnga a mel, yar nixmox zzar dder yarzi Arbosobo leil perniar gaxzi a. Ha arseir bbeix, armael Arbosobo dax cirgo a hher dax dae bbaexl eine bbeix a mel dder Yisu bei dae mel dax bei mae dae mibbe. Eine bei a mel niul dder niul Arbosobo dax cirgo a hher dax dae saexl a.

⁷ Ngo perniar dae ca mel, ngo nia leil vaexr gger dae eil ddei mel, jiajia miardal teixl lei nr nga. Nia Zidu leil ddarzzi beil halleix dder zza. Nia lei miardal dae ddar eil ddei bbejjiur goxr a. ⁸ Nael eilboxl ngo nia leil vaexr gger dae miardal dae eil ddei mel bbeix teixl lei beil⁹ a nga seir. Yarzi bbele ddei mel zoxl teixl lei ho a; neixmarmarmo hal mel mel mier dae a.^h Yel Yisu nei nia lei miardal dae eil ddei dax bei mae dae a, ca mel dder eil ddei mel yarzi a saexl a.

⁹ Yel ha arseir bbeix armael mel bbele ggie hher dae bbaexl eine bbeix, nael halae arzzi-nimar leil vuxryixr a mel, neixmar ggie hher dae a.ⁱ

¹⁰ Nael ha arseir arzzi-nimar leil perniar a mel dder bbele ggie nixixl goxr dae a. Yel yar nixmox ddei dder yar leil zuixl bei ssi lol nr var. ¹¹ Ha

^f2:2 Xiboxrlaexr Sul 9:1–10:14 leil biar dae.

^g2:8 *miardal dae eil ddei mel bbeix teixl lei beil* Miardal dae ddar eil ddei mel dder zzicarzzi leil perniar nia. Yuehal Sul Cir Ber 3:11 leil i ssi.

^h2:8 Neixmarmarmo hal mel mel dder Arbosobo leil dir su mel nga a. Yarzi bbele ddei mel dder Yisu nga a.

ⁱ2:9 Yilsu ddei mel dder bbeix, ha arseir bbeix Yisu leil saexl bbaexl eine bbeix, nael halae ca mel leil vuxryixr a mel, Yisu leil saexl su nr nga.

arseir arzzi-nimar leil vuxryixr a mel, neixmar ggje hher dae, neixmar ggje ssi dae a. Neixmarmarmo nga a, yar meixddur ddei mia nr xie a. Yel yar arddol ssi nia nr saexl a.

Yuehal Mel Yisu Leil Ddarzzi Su Mel Leil Quex

¹² Albor, allor, Yisu Zidu mel nia leil si gger a, nia ddei zuixl mel leil mel ssoxrsuxl ho a;
yel ngo nia leil eil mel vaexr gger.

¹³ Arbomar mel, nia mel merlo-milo lei nr zza seir dder zza ho
Arbosobo ddei leil saexl a;
yel ngo nia leil eil mel vaexr gger.

Caleixlssor mel, nia mel nixmox cirtaex-lorbba neix gaxzi^j hal te leil bei leixl gger a;
yel ngo nia leil eil mel vaexr gger.

¹⁴ Albor, allor, nia mel Merhhexr Arbbor leil saexl a;
yel ngo nia leil eil mel vaexr gger a.

Arbomar mel, nia mel merlo-milo lei nr zza seir dder zza dae
Arbosobo ddei leil saexl a;
yel ngo nia leil eil mel vaexr gger a.

Caleixlssor mel, nia mel Arbosobo ddei ddar mel nixmox zzar ji dae a,
nixmox ddei yarzi hhel,
halae nixmox cirtaex-lorbba neix gaxzi su hal te leil bei leixl gger
a;

yel ngo nia leil eil mel vaexr gger a.

¹⁵⁻¹⁷ Niul middurbbor hazza lei lizoxr nr ddo. Ggecir ddei li niazzir dae

^j**2:13** *nixmox cirtaex-lorbba neix gaxzi* Nixmox cirtaex-lorbba neix gaxzi su hal te mel dder neir zzirmar Sardaxl.

mel, meixddur ddei mia a li niazzir dae mel, halae col a azo zza nei azo bei kuar niazzir dae mel, middurbbor cirza-hanga eil mel mel Merhhexr Arbbor xiar dae mel nr nga a nei, middurbbor Arbosobo leil dir su cassor-worssor mel xiar dae arddeir a. Middurbbor ddei nei Arbosobo leil dir su mel lizoxr dae eil mel mel mier jiur a; nael Arbosobo xiar dae mel dax bei mae dae su mel mel cirse-cirsil lei zza dae nia. Yel niul middurbbor cirza-hanga mel leil lizoxr doxr nr ddo. Eil mel leil lizoxr a mel nixmox ddei dder Arbosobo leil per-nr-niar a.

Zidu Leil Dir Su

¹⁸ Albor, allor, eilleix mel nixixl ddei maelele goxr ci a.^k Nia Yisu Zidu leil dir su te ddux lei bbeix ggie bbejjiur goxr a; nael eilleix Zidu leil dir su cirke ddux lei ho a; yel niul dder nixixl ddei mel maelele goxr ci a saexl a. ¹⁹ Ca eil mel mel niul dax cirgo a jiaxlhuixl gga hher goxr a. Nael yaa niul dax ciryoxr a nr nga. Yel yaa niul dax hher dax nr yuex. Yaa niul dax ciryoxr a nga arddeirnga a dder niul dax cirgo a hher dae. Yaa niul dax cirgo a hher nr yuex a niul dder yaa niul dax ciryoxr a nr nga saexl a.

²⁰ Nia nael, seirceix-seirmaer hal ddei yar ddei Xiu ddei nia leil gger a. Yel nia maelmaerjjia lei ddarzi mel leil saexl. ²¹ Ngo nia leil eil mel vaexr gger a mel nia ddarzi mel leil nr saexl a vaexr gger nr nga; eil mel mel nia saexl. Nia ca leil fur su mel bbeix dae ddar mel yarzi nr nga lei saexl.

²² Ca leil fur su te mel arseir a neil? Hherdder Yisu mel Zidu a nr bbeix su te nga a. Yar mel Zidu leil dir su te nga a. Yar Merhhexr Arbbor Arbosobo nei yar ddei Ssor Yisu Zidu leil nr ssexl. ²³ Ha arseir Ssor leil nr

^k**2:18** Arddolcar a Yisu jjixr lei nia, yel yar yar dax mae su mel leil jiuxl lei, yar dax nr mae su mel leil nael faxr lei. Yisu jjixr lei du xilmeir leil mel nixixl ddei maelele eine bbeix.

ssexl a mel, Arbbor yar nixmox zzar hher nr ji dae. Ha arseir Ssor leil ssexl a mel, Arbbor yar nixmox zzar hher ji dae.

²⁴ Yel nia mel nia Zidu leil ddarzzi beil halleix bbejjiur goxr mel nixmox zzar holcir ji doxr dae nia. Nia hal mel holcir ji doxr dae arddeirnga a, Arbosobo nei yar ddei Ssor Yisu dder nia dax hher ji dae a. ²⁵ Arbosobo mel niul leil cirse-cirsil lei gol dae lol bbeix har zaxr goxr.

²⁶ Ngo nia leil eil mel vaexr gger a mel, nia leil fur niazzir dae ca hal mel leil biar arddeir a. ²⁷ Nia nael, Seirceix-seirmaer ddei Xiu ddei nia nixmox zzar hher ji dae a, yel si nia leil eil mel mul gger nr ssa a. Seirceix-seirmaer ddei Xiu ddei nia leil azo lei mul gger. Yar mul gger dae mel lei yarzi a; yarjiar nr nga, yel nia dder Seirceix-seirmaer ddei Xiu ddei mul gger dae mel sael a, yar dax bei mae dae nia.

Arbosobo Ddei Anix

²⁸ Albor, allor, nia mel Arbosobo dax bei mae dae nia. Eine nga a mel, arddolcar a, Yisu jjixr lei nixixl hal cir ni ci a mel, niul dder yixrsixr nr zza nr zza a; nixmox vaervaermo, yar xilmeir hher dae cexr a. ²⁹ Nia Arbosobo mel nixmox cirtaex-lorbba seir gaxzi saexl arddeirnga a, nia dder ha arseir seirseir bei a mel dder Arbosobo ddei anix a saexl a.

3

¹ Merhhexr Arbbor mel niul leil einezeixl perniar, yar niul leil yar ddei anix a bbeix naer! Niul mel dder yar ddei anix nga a! Arbosobo leil nr saexl cassor-worssor mel mel, niul Arbosobo ddei anix a nr saexl. ² Ngo perniar dae ca mel, niul mel Arbosobo ddei anix a. Arddolcar a niul arsae nga var mel halae niul leil nr mia lol seir, nael niul saexl, Yisu Zidu lei hal cir ni ci a, niul yar leil malmal mia a, yar sael a nga nia. ³ Yel ha arseir Yisu sael a nga loxia dae a mel dder armael ddei nixmox taex seibeix lol, hherdder Yisu nixmox cirtaex-lorbba seibeix sael a nga.

⁴ Nael arseir zuixl bei dax doxr a mel dder Arbosobo ddei Lixlfaxr mel leil dir a. Zuixl mel dder Arbosobo ddei Lixlfaxr mel no-nr-ni mel nga a.

⁵ Nia lei saexl, Yisu Zidu lei a mel niul ddei zuixl mel leil bei pixl gger lei arddeir a. Yar armael mel zuixl nr zza. ⁶ Yel ha arseir Yisu Zidu dax hher dax dae a mel dder zuixl bei nr dax, nael ha zuixl bei dax su mel mel dder Zidu leil mia nr seix, saexl lei saexl nr seix.

⁷ Albor, allor, nia mel ca mel nia leil fur dae lol nr ddo. Seirseir bei dae su mel saelnei seir su a; hherdder Zidu mel seir sael a nga. ⁸ Neir zzirmar te mel Arbosobo mer coxl mi coxl halleix cirdae a dder zuixl bei dae a. Yel arseir zuixl bei dax dae a mel dder neir zzirmar te dax ciryoxr a nga. Arbosobo ddei Ssor Yisu lei a mel, neir zzirmar te bei dae mel leil bei xiaxr gger lei arddeir a. ⁹ Ha arseir Arbosobo ddei anix a mel, yar nixmox zzar Arbosobo ddei Xiu ddei hher ji dae,^m yar zeixleixr zuixl bei nr dax a. Yar lei Arbosobo ddei anix a, zuixl bei nr var. ¹⁰ Arseir mel Arbosobo ddei anix, arseir mel neir zzirmar te ddei anix, niul arsae saexl ddo neil? Hherdder ha seirseir mel nr bei dae bbeixsael arzzi-nimar leil per-nr-niar dae mel dder Arbosobo ddei anix nr nga.

Zzicarzzi Leil Perniar

¹¹ Niul mel zzicarzzi leil perniar nia. Eil ddei mel nia Yisu leil saexl beil halleix dder nia bbejjiur dae ddar ddei nga a. ¹² Nael niul mel Gieyir te sael a bei nr ddo; yar mel nixmox cirtaex-lorbba neix su te dax ciryoxr a

^l3:8 Neir zzirmar te bei dae mel mel dder cassor-worssor mel leil zuixl bei lol.

^m3:9 *yar nixmox zzar Arbosobo ddei Xiu ddei hher ji dae, Xilaxl ddar bbeix “Arbosobo ddei silmo hher ji dae.” Ddar eil qier ddei yilsi mel dder 1) yar nixmox zzar Arbosobo ddei Xiu hher ji dae, 2) yar nixmox zzar Arbosobo ddei ddar hher ji dae, 3) yar Arbosobo ddei olga zza.*

nga, yar, yar nimar leil seixl zil gger a. Yar arsaenga a yar nimar leil seixl zil gger neil? Hherdder yar zzael bei nr sir mel bei, yar nimar zzael seirseir bei a nga arddeir a.^{n 13} Arzzi-nimar arzzi-nimo mel, Arbosobo leil dir su cassor-worssor mel nia leil vuxryixr a mel, nia murgur nr ssa.¹⁴ Niul saexl, niul arzzi-nimar, arzzi-nimo mel leil perniar a mel dder, si ho a yoxl gol du xixl lei a. Nael arzzi-nimar, arzzi-nimo mel leil per-nr-niar su mel mel, si ho a dder gol du nr xixl lei.¹⁵ Nael ha arseir arzzi-nimar leil vuxryixr a mel dder caseixlsu a. Nia lei saexl, caseixlsu mel dder cirse-cirsil Arbosobo dax hher dae nr cexr.

¹⁶ Niul dder arsae bei a saelnei yarzi ca leil perniar saexl. Yisu Zidu mel niul leil olga dir gger a, niul lei arzzi-nimar arzzi-nimo mel leil olga dir gger mibbe.¹⁷ Ha arseir azo zza a mel, yar arzzi-nimar arzzi-nimo mel goxr sol ggie mia a, nael yar nixmox taex gex dae, eine nga a mel, yar halae yar ca mel leil perniar arsae bbeix cexr bbeixleir?

¹⁸ Albor, allor, niul ca leil perniar a mel meir ddei gga lar bbeix dae nr nga a nei, yarzi bei ssi nia.¹⁹ Eine nga a mel, niul dder niul mel ddarzi mel dax bei mae dae saexl, halae niul Arbosobo meixsaer qier leil lei nixmox ddei zzaso var.²⁰ Niul armael ddei armael leil sirzzi arddeirnga a lei, Arbosobo mel cirza-hanga lei saexl. Yar bir niul armael leil lei niul nixmox ddei leil mox dae xie, yel yar niul leil zoxlnixr.

²¹ Ngo perniar dae ca mel, nael niul ddei nixmox taex niul armael leil sir-nr-zzi arddeirnga a, niul dder nixmox vaervaermo Arbosobo dax hher dax dae cexr a.²² Yel niul Arbosobo miardal dae mel dax bei mae dae, niul bei dae mel yar leil nixmox lodda lol, eine nga a mel, ha niul yar dax qiuxr dae mel mel dder yar niul leil gger.²³ Arbosobo miardal dae ddei mel dder niul yar Ssor Yisu Zidu ddei mi ddei leil ddarzzi nia, halae yar miardal dae ddei dax zox dae a zzicarzzi leil perniar nia.²⁴ Yel arseir

ⁿ3:12 Cuaxlsixljil Sul 4 leil biar dae.

Arbosobo miardal dae mel dax bei mae dae a mel, yar dder Arbosobo dax hher ji dae a. Arbosobo lei yar dax hher ji dae a. Arbosobo mel yar ddei Xiu ddei niul nixmox zzar hher ji dae lol a, niul dder yar niul dax hher ji dae saexl a.

4

Arbosobo Ddei Xiu Ddei Nga Nga Bbe I Nia

¹ Ngo perniar dae ca mel, eilleix mel xiezi^o yarjiar cirke ddux lei ho a. Yel arseir bbeix yar armael mel Arbosobo ddei Xiu ddei yar leil ddar bbeix lol, eine bbeix su maelmaerjgia leil lei ddarzzi nr ddo. Nia yar ddar bbeix dae mel Arbosobo ddei Xiu ddei yar leil bbeix teixl lei lol nga nga bbe i nia. ² Nael nia arsae Arbosobo ddei Xiu ddei a saexl ddo neil? Hherdder ha Yisu Zidu mel ca loxr a, niul dax lei a ssexl su mel dder Arbosobo ddei Xiu ddei yar leil bbeix teixl lei lol. ³ Ha Yisu Zidu mel ca loxr a, niul dax lei a eine nr ssexl su mel dder Arbosobo ddei Xiu ddei yar leil ddar bbeix lol nr nga. Zidu leil dir su te ddei xiu ddei yar leil bbeix lol arddeir a. Nia lei Zidu leil dir su te ddei xiu ddux lei nia bbejjiur goxr a; eilleix yar middurbbor hher dae ho a.

⁴ Nael albor, allor, nia mel Arbosobo ddei anix a. Nia nixmox zzar hher ji dae Xiu ddei bir middurbbor hher dae xiu ddei^p leil ddo leixl. Yel nia xiezi yarjiar leil bei leixl gger ho a. ⁵ Yaa mel Yisu leil ddar-nr-zzi su

^o4:1 *xiezi* Xiezi mel ca lar nga. Yaa ddei miar ddei mel dder Arbosobo ddei ddar mel ca leil biar gger. Halae arddolcar a arsae lerler nga var ca leil bbeix gger zaxr. Nael xiezi yarjiar armel zza; yaa ca leil fur lalnga.

^p4:4 *middurbbor hher dae xiu ddei* Middurbbor hher dae xiu ddei mel dder neir zzirmar ddei leil bbeix. Yar mel middurbbor hher dae neir, tisir, halae caxiu maelmaerjgia leil vaer leixl.

mel dax ciryoxr a nga, yel yaa sael a ddar biar. Yisu leil ddar-nr-zzi su mel lei yaa ddar no. ⁶ Nael niul mel Arbosobo ddei aniux a; yel Arbosobo leil saexl su mel nael niul ddar no yuex, nr saexl su mel nael niul ddar no nr yuex. Eine nga a mel, niul dder arseir ddei xiu ca mel leil yarzi mel bbeix teixl lei lol, arseir ddei xiu ca mel leil fur lol saexl ddo a.

Arsae Perniar

⁷ Ngo perniar dae ca mel, ca leil perniar var nixmox taex mel Arbosobo niul leil gger a. Yel niul zzicarzzi leil perniar nia. Ha ca leil perniar su mel hherdder Arbosobo ddei aniux a; halae Arbosobo leil saexl.

⁸ Arbosobo mel ca leil perniar, yel ca leil per-nr-niar su mel dder Arbosobo leil nr saexl. ⁹ Arbosobo yar ddei Ssorzil ddei leil cassor-worssor mel dax zi mal lei a mel, niul yar leil ddarzzi a, niul leil olga zza doxr dae lol arddeir a. Arbosobo eine bei a, yar niul leil perniar niul leil saexl lol a. ¹⁰ Nael niul Arbosobo leil perniar nr nga a nei, Arbosobo niul leil perniar arddeir a. Arbosobo yar Ssor leil miardal a, yar leil zilabox loxr lol a, niul leil olga dir gger ssi lol, yel yar niul ddei zuixl mel leil ssoxrsuxl a. Yar eine bei a niul dder arsae perniar ssi nia saexl a. ¹¹ Ngo perniar dae ca mel, Arbosobo mel niul leil einezeixl perniar, yel niul lei zzicarzzi leil perniar nia. ¹² Arseir lei Arbosobo leil mia nr seix, nael niul zzicarzzi leil perniar arddeirnga a mel, Arbosobo dder niul nixmox zzar hher ji dae a, niul lei Arbosobo nei ca leil perniar gaxzi a.

¹³ Nael Arbosobo mel yar ddei Xiu ddei niul nixmox zzar hher ji dae lol a, yel niul dder niul mel Arbosobo dax hher ji dae, Arbosobo lei niul dax hher ji dae, saexl. ¹⁴ Arbosobo yar ddei Ssor ddei leil zi a, cassor-worssor mel leil jiuxl lei lol, ngua lei yar eine bei ggie mia a. Eilboxl yoxl ca mel leil lei ngua mia mel biar gger dae. ¹⁵ Yel ha arseir Yisu mel Arbosobo ddei Ssor a ssexl a mel, Arbosobo dder yar dax hher

ji dae, yar lei Arbosobo dax hher ji dae. ¹⁶ Arbosobo niul leil perniar mel niul lei saexl, Arbosobo niul leil perniar mel niul lei ddarzzi a.

Arbosobo mel ca leil perniar, yel arseir ca leil perniar a mel dder Arbosobo dax hher ji dae, Arbosobo lei yar dax hher ji dae. ¹⁷ Eine nga a mel, niul nixmox zzar lei ca leil perniar gaxzi a. Yel Arbosobo ca leil ser hal cir ni ci a, niul dder nixmox vaervaermo hher dae cexr a. Niul middurbbor hher dae car, yar arsaе nga mel niul lei yar dax ciryoxr a nga. ¹⁸ Arbosobo niul leil perniar a mel, niul nixmox zzar gexrgexr-zizi nr zza. Arseir Arbosobo leil gexr arddeirnga a mel, yar Arbosobo yar leil serpaxl lei a gexr a nga arddeir a. Nixmox zzar gexrgexr-zizi zza su mel mel Arbosobo leil nei ca leil perniar gax-nr-zi. Nael Arbosobo leil nei ca leil perniar gaxzi a mel cirdoxr lei gexr ddu nr zza.

¹⁹ Arbosobo mel niul leil hoba perniar a, niul lei dder Arbosobo nei ca leil perniar. ²⁰ Ha arseir “Ngo mel Arbosobo leil perniar,” bbaexl eine bbeix, nael yar arzzi-nimar mel leil vuxryixr arddeirnga a mel dder ca leil fur dae lalnga. Yar mia ddo arzzi-nimar mel leil lei per-nr-niar mel, mia nr ddo Arbosobo leil gielgiel perniar nr var. ²¹ Yel Arbosobo niul leil miardal a bbeix, arseir yar leil perniar a mel, arzzi-nimar mel leil lei perniar nia.

5

Arbosobo Ddei Ssor Leil Ddarzzi

¹ Nael ha arseir Yisu mel Zidu a ddarzzi a mel dder Arbosobo ddei aniuх a. Ha arseir Arbbor leil perniar a mel, yar ddei aniuх ddei leil lei perniar. ² Yel niul Arbosobo leil perniar, halae yar miardal dae mel dax bei mae arddeirnga a mel, niul dder niul mel yar ddei aniuх mel leil perniar saexl a. ³ Arbosobo miardal dae mel dax bei mae dae a mel dder Arbosobo leil perniar a. Yar miardal dae mel dax lei bei mae nr sol.

⁴ Arbosobo ddei anix cirddeir-hanga lei middurbbor nr seir mel leil bei leixl gger var. Niul eil mel leil bei leixl gger a mel, niul Yisu leil ddarzzi a nga arddeir a. ⁵ Nael bei leixl gger su mel arseir a neil? Hherdder Yisu mel Arbosobo ddei Ssor a ddarzzi su mel nga a.

⁶ Yisu Zidu mel ajjix gga sexlsir^q nei sixrzixljiaxl ddei leil sirnilni ddux a^s niul leil yar mel Arbosobo ddei Ssor a saexl lol a. Ajjix mel lar niul leil saexl lol nr nga a nei, sirnilni mel lei niul leil saexl lol a. Arbosobo ddei Xiu ddei lei niul leil Yisu mel yar Ssor a saexl lol a.^t Arbosobo ddei Xiu ddei mel yarzi mel lar bbeix. ⁷⁻⁸ Arbosobo ddei Xiu ddei nei ajjix halae sirnilni eil so yoxr jjia lei niul leil Yisu mel yarzi Arbosobo ddei Ssor a saexl lol a. Eil so yoxr niul leil saexl lol mel lei ciryoxr a nga. ⁹ Nael niul ca mel biar dae mel leil lei noni a mel, Arbosobo biar dae mel leil gielgiel noni nia. Arbosobo biar dae eil mel mel yar Ssor leil biar arddeir a.

¹⁰ Arbosobo ddei Ssor ddei leil ddarzzi su mel, yar nixmox zzar Arbosobo bbeix dae ddar mel yarzi nga saexl. Arbosobo leil ddar-nr-zzi su mel nael, Arbosobo yar Ssor leil biar dae ddar mel leil lei ddar-nr-zzi, yel yaa dder Arbosobo leil ca furlisu ar ddei i mal gger a. ¹¹ Niul yar Ssor leil ddarzzi a, Arbosobo mel niul leil cirse-cirsil lei yar dax cirgo a goxr dae lol. Arbosobo mel dder eine bei a niul leil yar bbeix dae mel yarzi a saexl lol a. ¹² Yel arseir Yisu Arbosobo ddei Ssor a ddarzzi a mel dder cirse-cirsil lei Arbosobo dax cirgo a goxr dae cexr; arseir Yisu Arbosobo ddei Ssor a ddar-nr-zzi a mel dder cirse-cirsil lei Arbosobo dax cirgo a goxr dae nr cexr.

Cirse-Cirsil Arbosobo Dax Cirgo A Goxr Dae

^q5:6 *sexlsir* Yuehal Sul 1:34 leil i cexr.

^s5:6 *sixrzixljiaxl ddei leil sirnilni ddux a* Yuehal Sul 19:35 leil i cexr.

^t5:6 *Sirtuxrxixruaxl* Sul 2 leil biar dae.

¹³ Ngo eil mel, nia Arbosobo ddei Ssor ddei leil ddarzzi su mel leil vaexr gger a mel, nia leil cirse-cirsil lei Arbosobo dax cirgo a goxr dax dae cexr saexl lol. ¹⁴ Niul Arbosobo xiar dae mel sael a qiuxr arddeirnga a mel, yar dder niul azo lerler qiuxr dae mel noni. Yel niul Arbosobo dax ddar biar a dder yar no-nr-ni lei a gexr nr ssa. ¹⁵ Niul Arbosobo niul leil noni var saexl arddeirnga a mel, niul dder ha niul yar dax qiuxr dae mel mel, yar lei niul leil gger saexl.

¹⁶ Ha arseir arzzi-nimar zuixl bei dae mia a, nael zuixl eil yox bei a mel yar leil si lol nr var, yel yar leil Arbosobo dax qiuxr gger a ddar biar gger nia. Eine nga a mel, Arbosobo dder yar leil cirse-cirsil lei yar dax cirgo a goxr dae lol. Zuixl ar yoxr a mel ca mel leil si lol var.^u Nael zuixl hal yoxr bei su hal ddei leil mel, ngo lei nia yar leil Arbosobo dax ddar biar gger nia nr bbeix a. ¹⁷ Ha nr seir bei a mel dder zuixl a; nael zuixl ciryoxr-hanga lei ca mel leil si lol var nr nga.

¹⁸ Niul saexl, Arbosobo ddei anix mel mel dder zeixleixr zuixl bei nr dax. Arbosobo ddei Ssor ddei yaa leil guaxr dae, yel nixmox cirtaex-lorbba neix su Sardaxl te lei yaa leil bei no gger nr xie. ¹⁹ Niul lei saexl, middurbbor maelmaerjgia leil lei nixmox neix su te guaxr dae, nael niul mel Arbosobo ddei anix a, Arbosobo niul leil guaxr dae. ²⁰ Niul lei yoxl saexl, Arbosobo ddei Ssor ddei lei ho a, yar halae niul leil yarzi Arbosobo ddei leil saexl lol. Niul Arbosobo dax cirgo a hher ji dae a mel dder yar Ssor Yisu Zidu dax hher ji dae. Yisu mel yarzi Arbosobo ddei nga a. Yar niul leil cirse-cirsil Arbosobo dax cirgo a hher dae lol.

²¹ Yel albor, allor, nia armael leil bbex mel dax naer lei naer lol nr ddo.

^u**5:16** *Zuixl ar yoxr a mel ca mel leil si lol var.* Zuixl eil yox mel dder Yisu leil ddar-nr-zzi, yar Arbosobo ddei Ssor leil cexr-nr-ssexl, yar ca mel leil weix a sixrxixljiaxl ddei leil si a gol du xixl lei cexr-nr-ssexl. Zuixl eil yox bei su ca mel cirse-cirsil Arbosobo dax bbe kae nia.